

ein ander. und nim einen vierdunc rosen dor zu. und nim yngeber und pfeffer. und win oder ezzig, und zucker oder honic. und siede daz zu sammene. und gibs hin und versaltzez niht.

5. *Diz heizzet ris von kriechen.*

Diz heizzet ris von kriechen. du solt ris nemen. und siude ez in eime brunnen. ¹⁾ zu halben wege so giuzze daz wazzer abe. und siude ez denne in eime reinen smaltze. und giuz daz smaltz denne herabe. und ein zucker dor uf. und gibs hin und versaltz niht.

(5^a) *Heidenische kuchen.*

Diz heizzent heidenische kuchen. Man sol nemen einen teyc. und sol (den) dünne breiten. und nim ein gesoten fleisch. und spec gehacket. und epfele. und pfeffer. und eyer dar in. und backe daz. und gibes hin und versirtez ²⁾ niht.

6. *Ein kluge spise.* ³⁾

Diz ist ein kluge spise. ein hirn sol man nemen und mel. und epfele und eyer. und menge daz mit würtzen. und striche ez an einen spiz. und bratez schœne und gibz hin. daz heizzet hirne gebraten. daz selbe tut man einer lungen die gesoten ist.

7. *Diz sint haselhüener.*

Haselhüener von friesental mache also. Man sol nemen reynevā und peterlin. ⁴⁾ und salbei under ein ander. und ein wenic brotes geriben dar zu. und würtze und eier. und ribe daz mit wine. und siude daz wol under ein ander. und gibz hin.

8. *Ein gebraten gefültes ferhelin.*

Ain gebraten gefültes ferhelin mache also. Nim ein verkelin, daz drier wuchen alt si. und brüe daz küele. und ziuhe im daz har

¹⁾ Wasser. — ²⁾ Entweder verschrieben oder der Imperativ von verseren. —

³⁾ Entweder so genannt, weil sie Hirn als Hauptingrediens hatte, oder aber üppige Speise; vgl. Boner's Edelstein, herausg. v. F. Pfeiffer pag. 79, 155. — ⁴⁾ reinevan, tanacetum L. = Rainfarren; peterlin = Petersilie.